

## **Mustér per strategia cun Sedrun ed Andermatt**

**(anr/hh) Il gliendisdis ein representant(a)s dalla vischnaunca e dallas organisaziuns turisticas da Mustér sefatschentai dalla structura turistica futura. En quei connex ei vegniu decidiu unanimamein da cuntinuar cun la collaboraziun cun Sedrun e d'extender quella sin Andermatt.**

Suenter ch'ils partenaris da Sedrun eran gia sedecidi avon per quella via, ei la damonda d'ina separaziun dalla destinaziun ussa giud meisa. Alla seduta ein representants dalla vischnaunca, gastronomia e hotellaria, Pendicularas Mustér SA, uniun da commerci e professiun, Scola da skis Mustér e Sedrun Mustér Turissem separticipai. Suenter ch'ils arguments pro e contra ina collaboraziun ein vegni discutai ei la decisiun finala vegnida prida. Cumbinada cun quella decisiun ei la posiziun, che la structura futura sto esser habla da tener quen da projects surordinai e communabels, mo era dils basegns locals. La decisiun ei vegnida prida cun il scop che la cuntinuaziun dalla collaboraziun, respectivamein l'extensiun dalla collaboraziun sin Andermatt, gida a contonscher las finamira communabla per avantatg dall'entira regiun. Consequentamein duei la lavur communabla da Sedrun e Mustér vegnir cuntinuada cun la finamira da concretisar las structuras novas e da realisar quellas ensemen cun Andermatt.